

Un pida historia lubida

Boy Ecury: un ciudadano di Reino ehemplar

DEN HAAG— E conmemoracion di 4 di mei y celebracion di “Bevrijdingsdag 5 di mei” ta motibo pa Minister Plenipotenciario di Aruba sr. Edwin Abath pidi atencion pa loke e ta yama “un pida historia lubida”. ‘Mi ta referi na Boy Ecury.

Un estudiante hoben di Aruba cu tabata activo den e movimiento di resistencia Hulandes, kende pa su curashi a paga e maximo prijs, esta su bida. Boy Ecury a wordo fusila dor di e Alemannan despues di a wordo traiciona.’

‘Ningun hende lo a tume na malo, si na momento cu

Guerra a start, e lo a regresa su isla natal Aruba pa ta hunto cu su famia. Un hoben den pleno flor di su bida, kende a bin Hulanda pa studia y forma su mes como profesional pa un carera grandi cu tabata warde na su regreso na Aruba. Pero Boy no a duda ningun momento pa drenta e Resistencia Hulandes y tabata dispuesto pa sacrifica su bida pa Hulanda, cu no tabata su patria, sino manera nos ta yam’e: ‘madre patria,’ segun Abath.

‘Boy Ecury tabata Arubiano y tabata orguyoso di su descendencia. Sinembargo e tabata sinti su mes alabes



un ciudadano di Reino y a scoge cu conviccion pa yuda y salba su compatriotanan di e yugo y opresion Aleman. Esaki ta bisa hopi di con e hendenan na Aruba y e otro islanan Hulandes den Caribe tabata sinti nan mes uni cu Hulanda manera cu awendia ainda ta e caso. No ta pa nada nos ta comparti un Reino y un Reina cu otro. E sentimento aki a resalta den mas di un forma: e refinarianan na Aruba conhuntamente cu esun na Curaçao, tabata e principal suministrado di combustibel pa e avionnan di e forzan aliado.’

‘Esaki ta bisa nos algo di e sentimento pa Reino cu ta reina aki na Hulanda, na momento cu den e siman cu ta recorda e periodo di 1940-1945, e hazañanan di Boy Ecury y e sosten dor di e partinan Caribense di Reino no ta haña debido atencion. Esaki ta e razon cu nos a dicidi pa na diferente manera pidi atencion pa e pagina di historia lubida aki.’

Ariba 4 di mei un cantidad di casi binti estudiante Arubiano lo pone, den nomber di Gobierno y pueblo di Aruba, un kran na e monumento na Waalsdorpervlakte na Scheveningen, cerca di e luga unda Boy Ecury a wordo fusila ariba 6 di november 1944.

Riba diabierna 6 di mei lo tuma luga den “De Balie” na

Amsterdam – en cooperacion cu Vereniging Antilliaans Netwerk y Genootschap Nederland Aruba – presentacion di e pelicula “Boy Ecury”. Prome cu e presentacion lo tin un introduccion di Minister Plenipotenciario sr. Edwin Abath y e escritora Giselle Ecury, sobrina di Boy Ecury. E evento lo cuminsa 7or y mei y porta ta habri for di 7or di anochi.

‘Cu e actividatnan aki nos kier pone un vinculo entre e estudiante Boy Ecury y e generacion di hobennan di awendia.

Nan ta crece den un sociedad cu ta birando mas duro, unda tolerancia y solidaridad mas y mas ta bou presion. Nos cu ta forma parti di Reino lo mester purba na para e desaroyo esaki, door di splica hobennan na Hulanda kende tabata Boy Ecury. Pa logra esaki nos kier bin cu un pakete di les pa e scolnan.’

‘Lo ta hopi bon si e generacion hoben – tanto na Aruba como na Hulanda – cera miho conoci cu Boy Ecury y cuminsa pensa ariba loke Reino Hulandes ta nifica pa nos tur. Pa logra esaki ta bon pa nos enfoca mas ariba loke nos ta comparti cu otro y no loke ta dividi nos.

Pa Boy Ecury e sentimento aki tabata algo natural. E tabata un ciudadano di Reino ehemplar. Y te ainda e ta!’, segun Minister Plenipotenciario Edwin Abath. □